

曾文正公奏稿

曾文正公奏稿

卷之十九 目錄

克復石埭太平涇縣三城摺

同治元年四月初四日

克復巢含和三城並銅城閘等隘摺

全日

克復繁昌縣城摺

四月十五日

克復旌德縣城摺

全日

克魯港要隘復南陵縣城摺

五月初三日

克復太平蕪湖兩城摺

五月十七日

官軍水陸並進疊克要隘駐軍雨花台摺

近日軍情片

鮑超軍進攻甯郡勦平逆壘摺

五月十九日

議覆兼攝通商大臣摺

六月初六日

議覆調印度兵助剿摺

六月二十二日

金陵陸師勝仗張勝祿請卹摺

七月初二日

克復甯國府城摺

全日

懲豁免江西歷案攤捐款項片

巡撫李續宜聞訃丁憂摺

七月初十日

近日軍情片

克復石埭太平涇縣三城摺

同治元年四月初四日

奏爲鮑超一軍連破賊壘克復石埭太平涇縣三城恭摺馳陳

仰祈

聖鑒事竊浙江提督鮑超率所部擊退援賊攻拔青陽

臣

於三

月二十四日奏報在案鮑超在青陽息軍三日休養士卒料該

逆立腳未定利在速攻自應先取石埭太平以固徽州之防繼

取涇縣以達甯國之路二十日徧諭諸將士裹飯傳餐捲旗疾

趨次軍龍口爲詰朝進攻計二十一日由龍口率隊前行直抵

石埭城壘各賊始猶閉關死守伏匿不出鮑超飭令婁雲慶劉

玉堂等攻西門而以李文益一營佐之黃慶熊鐵生等攻北門

而以顏紹榮一營佐之劉順隆段大有等則向東門進唐仁廉  
伍華瀚等則向大南門進馮標吳騰芳等則向小南門進分軍  
爲五營時合圍附郭諸壘穴牆施礮向外猛擊我軍佯卻數武  
使賊少懈突將火器環壘飛擲燃及哨棚各營乘賊駭亂之時  
囊土墳濠而進刀矛攢刺殪賊無算悉端十四壘平之將冒刃  
衝出之賊盡驅入城城上矢石交下猝不可近奮勇猛撲數次  
將弁頗有傷亡婁雲慶李文益熊鐵生顏紹榮等憤怒填臆帶  
領眾軍士各負片板直薄城根蕭信春身受數創猶復往來衝  
突奮力急攻遂從西北二門斬關而入立復城池該逆奪命狂  
奔追擊二十里殲斃五千有奇俘獲近四百人此三月二十一

日攻克石埭縣城之情形也石埭既復賊愈惶懼因糾合援賊二萬餘眾由涇縣南陵而來羣集於甘棠鎮阻我師之進路二十二日鮑超率馬步全軍倍道馳往遙見賊隊如蠅如蟻密排十數層勢甚梟悍文九和黃慶吳騰芳等三營先從中路進擊劉順隆王衍慶劉玉堂陳得勝譚勝達段大有等六營分兩翼包抄搏戰數時該逆屢卻屢前馮標伍華瀚唐仁廉明興楊鎮魁張應超等忽由山後揚旗吹角整隊齊出衝動賊陣不復成伍盡棄甘棠賊壘十七座而逃我軍悉力追逐進薄太平縣西門譚勝達文九和段大有等先毀高山四壘引軍齊上俯瞰城中令眾勇以火箭環射延燃藥局煙燄蔽天喊聲動地賊即驚

潰遂啟東門望涇縣大道而逸當將縣城收復各軍分投掩襲  
一路積尸若阜流血沒胫俘獲之數較石埭爲尤多并擒僞主  
將徐國華僞安天義蕭幅勝僞頂天福劉世民僞望天侯徐應  
超僞中天安何雲龍及檢點參護等逆首三十七人訊據供稱  
僞奉王古逆已爲亂軍衝散等語此二十二日攻破甘棠收復  
太平縣城之情形也先是鮑超進取青陽正在圍攻未下忽有  
僞佐將張遇春率眾萬餘來營乞降鮑超以勁敵在前遽收降  
眾恐生他變諭令暫駐旌德之三溪俟立功後再議至是太平  
敗匪遁出黃華嶺外不滿七八千將圖折入三溪潛結張遇春  
之眾竄併涇縣乃行甫數里見張遇春整隊而來出賊不意縱

橫格鬪賊大錯愕望密籌叢莽中踰嶺急走張遇春入山搜捕殺賊三千擒賊至八百餘名之多古逆一股幾無子遺時鮑超已回軍甘棠既得張遇春獻捷之信旋聞涇賊將由灣灘至鳳村上竄二十七日傳集各營並張遇春降卒成軍以進將及鳳村賊已聞風退遁縮入灣灘我軍知賊怯甚奮勇疾馳遂薄灣灘下寨二十八日鮑超先派張遇春擇險設伏乃以所部八營連環進擊使出壘之賊無或少休翦炳南楊鎮魁劉順隆等潛出左路譚勝達張應超梅仁富等潛出右路張遇春伏兵突從後路如牆壓下該逆惶遽失措不能歸壘唐仁廉馬勝奎舉旗縱馬直擣中堅盡破灣灘卡壘躡賊尾追至於城下梅仁富先

拔西門水卡唐仁廉等隨毀東南土壘一擁入城登時克復斬獲甚多此二十三日新收降人截擊太平餘逆二十八日進復涇縣城池之情形也臣查石埭太平南蔽黟歙涇縣東達宣城爲戰守所必爭鮑超一軍自拔青陽而後仗

聖主之威席全勝之勢未逾七日連復三城從此羣蟹喪膽籌勦甯國漸有把握在事出力員弁兵勇可否容臣彙入青陽一

案保獎之處出自

恩施至力戰陣亡之將弁二十四員名月繕清單應請

敕部從優議卹所有官軍乘勝克復石埭太平涇縣三城緣由謹繕摺由驛六百里具奏伏乞

皇上聖鑒訓示謹

奏

克復巢含和三城並銅城閘等隘

摺

同治元年四月初四

奏爲水陸各軍克復北岸巢縣含山和州三城並攻奪銅城閘  
雍家鎮裕溪口西梁山沿江四要隘恭摺馳報仰祈

聖鑒事竊自逆匪分踞江岸以北上援廬州下衛金陵全恃分  
布堅城據守險要以通上下之氣而阻進兵之路江蘇布政司  
曾國荃到防以後與水營總兵李成謀成發翔等熟商以爲欲  
制賊命必先從巢縣下手欲攻巢縣必先從銅城閘下手因分  
撥陸隊會合水軍剋期進取三月十五日曾國荃自率十二營  
由林台過河以逼巢縣東北一路令劉連捷副後南後等營赴  
望城岡堅修營壘以扼巢縣正南路復令朱寬義朱惟堂朱

洪章楊鎮南馬步各營助之詎營牆甫築數尺巢城之賊繞出  
田埂分股來撲我軍排隊迎戰賊方少卻把總鄭安盛張興富  
衝賊過猛歿於陣中朱洪章馳斬賊酋劉連捷朱寬義等揮軍  
縱擊斃賊四百有奇餘悉潰走我望城岡之營駐紮既定曾國  
荃派原駐運漕之陳湜蕭平泗周惠堂等往約記名總兵成發  
翔帶內河師船暨王東華蔡東祥等帶淮揚師船夾勦銅城閘  
之賊維時成發翔先撥數營駛入清溪河而親率所部同淮揚  
後營蔡東祥前營賴榮光右營陳東友中營陽利見來會於銅  
城閘渡口十八日議以水師攻閘東石壘陸師攻閘西土壘我  
軍齊進賊卽出拒戰不逾時成發翔陽利見帶隊登岸繞壘大

呼眾勇抽刃環刺遇者輒斃賊乃棄壘散竄石壘既破土壘亦平立將該鎮克復銅城間之前則有雍家鎮爲焦湖之鎖鑰亦巢舍之外藩水陸兩軍謀於十九日乘勝進取陳湜分制字營趨鎮之南蔡東祥及親兵營分旱隊趨鎮之北仍以戰艦數十密排水次萬礮同轟聲徹天半適總兵李成謀李朝斌彭楚漢羅進賢等帶外江水師由白馬嘴飛槳而來分路登岸四面環攻岸上賊眾悉遁入船河中賊划悉擊入水倖脫之賊十不及一此三月十五日擊退望城岡竄賊十八十九等日攻復銅城聞雍家鎮之情形也先是雍家鎮一隘尚在攻而未下曾國荃親率陸師星夜渡河已至巢縣之北連營旅山鼓山放望岡一

帶王東華水師亦由清溪河進攻巢縣之東門外至是成發翔  
陽利見各率礮划先後駛抵河下併力奮攻時至夜分城上更  
鼓忽絕城中煙燄橫飛旋獲賊諜訊供逆酋僞顧王吳于孝僞  
封天義徐同江恐巢北陸師進而合圍歸路已斷焚屋焚糧圖  
向含山宵遁曾國荃急令劉連捷朱洪章朱寬義朱惟堂等營  
協同水師於二十日辰刻會復城池而自將張勝祿武明良李  
臣典等十三營及楊鎮南所部騎卒三路跟追縱軍截勦伏尸  
數十里乘勝馳抵含山城外該城守賊甫見敗賊之狂奔旋駭  
官軍之踵至聞風喪膽不敢拒戰相率竄奔各軍遂入含山縣  
城搜獲賊糧逾二千石撲殺餘匪近三百名會以日暮雨集撤

夜不停次日駐軍少息二十二日曾國荃拔營疾進行未中途  
偵知巢含漏網之三賊渠收集醜黨尙在鍼魚觜過江乃以偏  
師向鍼魚觜而以正兵進襲和州逆首僞東天義劉惟久僞同  
天安尹賢瑞未及糾眾交鋒各營哨以火毬火箭環城壘而轟  
乘賊譁亂克城毀壘立復和州殺斃甚眾得礮械米穀尤多乘  
勝追賊至鍼魚觜合軍勦洗江流盡赤此二十日連復巢縣含  
山二十二日克復和州之情形也北岸要區悉爲我有所未得  
者裕溪口而外尙有西梁山爲第一重險二十三日曾國荃統  
全勝之師循江而上將與各水營共設攻取之謀乃師次木橋  
鎮忽遇零匪七八百眾排列洲上呼舟爭渡卽派信字仁字嚴

字三營及馬隊一營繞出洲前圍而殺之無一得脫維時李成謀外江水師成發翔內河水師及蔡東祥等准揚水師早至西梁山下令水勇各執長炬鎔斷截江鐵索飛駕師船環轟不下比曾國荃一軍馳至見該處倚山爲險深溝高壘礮眼層列勢難仰攻商令水師扼江面以擊賊船陸師布長圍以困賊壘籌商甫定適陳湜蕭孚泗亦引軍來助具述彭毓橘周惠堂等於本日會同蔡東祥陳東友成俞卿等水軍攻裕溪口克之隨戰於江心洲殺賊無算賊向北岸下游而竄乃知我軍在木橋鎮洲上圍殺一股卽裕溪口遁出之賊也是夜曾國荃圖雨結營壘而陣弓挑銳卒守要路以杜旁竄旋有數賊持書自投詭

稱賊目僞鋌天義涂萬起已偷渡南岸餘願舉眾乞降曾國荃  
察知情僞姑執之以觀其變二十四日嚮明賊乘雨猛火器不  
燃竟悉眾踰壘而出向江洲一路衝走水師陸師爭起搏擊該  
逆先有降約後有退志眾心紛亂引頸受誅尸駢洲次罕有脫  
者遂奪取西梁山撥軍駐守此二十三日攻取裕溪口進剿江  
心洲二十四日旋克西梁山之情形也臣伏查長江天塹久爲  
賊踞自進兵北岸以來決旬之間連克巢含和州三城並克要  
隘四處西梁山古稱天險該逆所恃爲金陵門戶茲以輕兵奪  
獲此關實足伸

天討而快人心除曾國荃不敢仰邀議敘外此次尤爲出力之

提督銜福建漳州鎮總兵李成謀請

交軍機處記名遇有提督缺出請

旨簡放提督銜浙江處州鎮總兵李朝斌請

交部從優議敘綏靖鎮總兵李濟清記名總兵成發翔左光培均請

賞加提督銜總兵銜副將彭楚漢羅進賢均請

交軍機處記名遇有總兵缺出請

旨簡放儘先副將鄧萬林請

賞給二品封典儘先副將何昌登請

賞給勇號儘先游擊郭仕林請免補游擊以參將儘先選用五

品軍功戴德祥請以千總儘先補用並請

賞戴藍翎加守備銜候補道劉連捷請

賞加按察使銜提督銜記名總兵張勝祿請

交部從優議敘副將蕭開印武明良朱寬義朱惟堂均請

交軍機處記名遇有總兵缺出請

旨簡放花翎副將蔡東祥王東華均請

賞給勇號花翎參將陳東友賴榮光均請以副將歸兩江補用  
參將朱洪章李臣典楊鎮南均請以副將儘先推補道銜候補  
知府陳湜請以道員歸部遇缺卽補花翎知府彭毓楠請

交軍機處記名遇有道員缺出請

旨簡放花翎游擊陽利見請以參將儘先補用並請

賞加副將銜花翎游擊銜都司成僉卿請以游擊儘先補用並

請

賞加參將銜陣亡把總鄭安盛張興富請

敕部從優議卹其餘在事出力員弁可否容

臣開單奏獎出自

恩施所有水陸官軍克復兩縣一州攻奪沿江各要隘緣由謹

會同大學士湖廣總督

臣官文安徽巡撫

臣李續宣恭摺由驛

具陳伏乞

皇上聖鑒訓示謹

奏

克復繁昌縣城摺同治元年四月初四日

奏爲大股賊眾窺撲三山經官軍併力擊敗乘勢攻克繁昌縣  
城恭摺馳陳仰祈

聖鑒事竊三四等日駐防三山花翎同知直隸州曾貞  
幹一軍迎擊竄匪迭獲大勝臣於二十四日附片具奏在案偽  
匪王賴文鴻既被重創遁入繁昌復約該處踞賊偽佐將林有  
志偽亞天豫吳大齋等於十八日糾黨八千餘人乘夜嘯聚松  
林口將謀再逞十九日昧爽由松林口分四路迤邐而來一股  
出汪家橋圖犯張唖所部唖字營一股出月子橋圖犯成東昇  
所部東字營一股出木雞山圖犯黃潤昌所部崑前崑後兩營

仍分月股從楓樹圩渡河潛至老山一帶冀襲諸營之後曾貞  
幹升高瞭望見附近村落煙燄不斷旌旗掩映林谷閒往來如  
織或卻或前乘該逆尚未偏營卽令黃潤昌成東昂張峻等各  
出六成隊伍分道馳勦並令晏恭山恭字營陶保堂保字營抄  
出三華山麓策應各營兼備老山襲後之賊未幾賊隊齊至更  
番迎撲時值東北風盛利在火攻我軍以槍礮環轟火隨風猛  
對陣矇目不能仰視峻字崑字等營先將賴林二逆乘勢擊卻  
羣賊大亂倉皇欲遁逆渠吳大觜猶恃老山伏賊未發回鞭轉  
鬪驅眾向前曾貞幹親率曾正明葛東庭各營哨騎馬而至突  
入垓心槍擊吳大觜殪之縱橫盪決所向盡靡諸路敗匪先後

潰至馬口地方爭渡而溺者無數二十日曾貞幹謀知該逆退踞繁昌城內不敢復議出戰乘此有隙可圖定計潛師以襲之是晚漏甫二下傳令黃潤昌成東昂胡基茂等各撥兩哨攜帶雲梯偃旗息鼓向松林口疾馳而進會抵城下令鹿前營趨北門崑後營趨東門東字營趨西門閟南門一面闕而不圍以恭保金陵三營爲游兵截擊南路逸出之賊曾貞幹所帶湘恆營及曾正明親兵騎隊設伏於松林口內一應攻城之官軍一防蕪湖之賊援時至五更我營束薪爲炬火光突上礮聲環偏震撼城樓城賊驚起排列垛口亦以火器下擲相持未久天已向曙晏恭山陶保堂張峻等正思引軍助戰營見賴逆先率醜黨由

南門拔關而遁急回軍兜截曾貞幹率曾正明馬隊伏兵齊來  
夾擊賴逆奪路向南陵涇縣竄走維時薄城將士愈攻愈奮成  
東昇黃潤昌親冒矢石從西北門女牆缺處緣梯先登猱升而  
上眾軍一擁盡入合力搜勦林逆率敗殘餘匪在亂軍中乘閒  
潰逃遂於二十一日克復繁昌縣城計兩日之戰擒賊三十四  
人斃賊一千六百名所獲礮械不可數計伏查繁昌地處濱江  
淪陷入載上以屏障南陵下以犄角蕪湖此次屢挫逆鋒攻克  
堅城三山各營將弁著有微勞除曾貞幹係臣胞弟不敢仰邀  
議敘外所有尤爲出力之兩江補用參將曾正明請

賞給勇號並請

賞加副將銜五品銜補用知縣黃潤昌請免補本班以同知直隸州知州補用並請

賞戴花翎補用副將直勇巴圖魯晏恭山請

賞加總兵銜兩江補用參將陶保堂成東昂均請

賞加副將銜參將銜兩江補用遊擊張哈請以參將儘先補用把總胡基茂請以守備儘先補用並請

賞戴藍翎其餘出力員弁兵勇可否容臣查明稟案保獎以昭激勸所有擊賊獲勝隨克繁昌縣城緣由謹繕摺由驛六百里陳奏伏乞

皇上聖鑒訓示謹

奏

秀和光一

克復旌德縣城摺

同治元年四月十五日

奏爲徽州防軍進攻旌德擊走踞匪遂將縣城克復恭摺馳陳  
仰祈

聖鑒事竊自提督鮑超一軍連克青石太涇四縣以來旌德與  
甯國賊勢中斷不能聯爲一氣現駐徽州之福建臬司張運蘭  
恐踞旌之賊窮極思竄鋌走徽境遂率所部湘營商同署皖南  
鎮總兵唐義訓派強中禮後三營以勦爲防先發制之三月三  
十日張運蘭引軍出湯口進次廟首謀聞賊在旌城堅伏未動  
並分股在三溪地方往來哨探謹備官軍張運蘭知賊情震懾  
乃集各營偃旗息鼓乘夜疾進於四月初一日辰刻行抵距城

十里之跳生橋先飭陳玉恆帶中右營列旗兩岸復分舒翰張  
聲壯潘家麟張兆輝張遵恆各隊作爲游兵以防賊由三溪抄  
我後路仍親督諸將士懸軍深入一二三旗向北門以唐義謨  
蔣信玉強禮等營應之四五六旗向西門以張運桂中左營應  
之七八旗向南門以彭先俊楊道東中軍四壯應之比及城圍  
賊匿不出張運蘭密遣前敵軍士棄戈釋甲偃臥道旁故亂其  
伍以誘戰又從山後駐馬瞭望遙見城賊四五千眾陣腳漸動  
將欲伺隙出巢遂令攻北門之易開修葉明瑞陳青雲攻西門  
之劉松山劉光明朱紹輝攻南門之黃萬友賀國秀等麾軍突  
起排礮仰轟競拔地鐵躍濠直進該逆惶急繞城環走飛石下

擊眾勇雖有傷亡而奮力爭先曾不少卻鼓聲礮聲猛若疾雷  
轟塌北門城牆丈許西門城垛十餘處張運桂<sub>圖</sub>烟突火躬率  
士卒竚附而升賊乃搶護垛口急以火器死拒我勇中槍而墜  
者四人受傷甚多張運蘭恐有挫失暫令收軍以俟詰朝進攻  
初二日昧爽各軍秣馬蓐食再圖決戰忽報城中之賊受創膽  
落悉數宵遁一由烏嶺走甯國縣一由梅嶺走竄甯郡張運蘭  
入城捕殺餘孽張運桂會合各旗營馳斬尾股斃賊不少解散  
脅從千餘人搜獲米糧數百石卽將縣城克復臣查旌德一城  
山徑叢雜攻守非易饋運尤艱此次孤軍進取逾日告克可以  
通徽甯之氣而固石太之防除將在事出力及接仗陣亡之員

弁兵勇容

臣查明分別奏請獎卹外所有徽州防軍克復旌德

縣城緣由謹繕摺由驛具奏伏乞

皇上聖鑒訓示謹

奏

克魯港要隘復南陵縣城摺

同治元年四月十五日

奏爲水陸各軍會克魯港旋分陸師攻克南陵縣城恭摺具陳仰祈

聖鑒事竊官軍連下魯港一隘南陵一城臣於四月初四日附陳梗概聲明俟稟報到日續奏戰狀在案旋據選用同知直隸州曾貞幹稟報繁昌既拔之後諜知蕪湖賊援潛在魯港增黨屯糧以圖抗拒遂商同總兵李成謀李濟清等水陸並攻爲日後進取蕪湖之地三月二十六日曾貞幹率湘恆營及晏恭山陶保堂張唖黃潤昌陸師五營進紫螃蟹磯之前李成謀正右營及左光培彭楚漢郭仕林水師三營李濟清副中營及羅進

賢何昌登水師二營分泊梟磯並螃蟹磯之下曾貞幹令各勇  
多備船筏搭造浮橋以濟陸兵仍由江口決開堤埂將彭楚漢  
所部舢舨飛划從缺口盡駛入港李成謀令戴德祥帶旱隊渡  
過南岸與入港之礮船緊相倚護二十七日曾貞幹黃潤昌張  
噲引軍渡浮橋而進專攻北岸賊壘晏恭山引軍循魯港隄邊  
而進陶保堂引軍循江邊大路而進合攻南岸賊壘李成謀督  
同各營官兵在江面乘駕師船轟擊水路之賊彭楚漢復從港內  
率水勇飛槳而出該逆腹背受敵撲水死者甚眾賊船百餘號  
賊礮數百尊悉爲我有兩岸陸師見賊勢已挫急向石壘石卡  
盡力奮攻又得水師各營登岸來助賊卽潰退立將三壘十餘

卡一律毀平遂復魯港餘匪悉向蕪湖竄走魯港既克之後所可下達蕪湖而上蔽甯國者止有南陵一縣則亦以速取爲宜二十九日曾貞幹飛調分守魯港之黃潤昌張唖等各率五成隊伍由石硊渡河而南仍親率所部並晏恭山陶保堂成東昂各營出繁昌山路整軍疾進密約四更時分各挾火具會抵南陵城下初我軍之將攻魯港也繁昌戍卒抽調一空曾貞幹以該處密邇南陵恐賊伺隙而動豫遣死士蓄髮易裝先往南陵附城一帶相度營基暗插標識復揚言大兵卽日壓境以懾賊心賊多自危不敢外竄至是曾貞幹帶同馬步諸軍乘夜猝至薄城而營萬炬齊燃光燭數里城賊倉皇驚起疑我軍從天而

下一時呼眾登陴紛如蠶旋手顛股栗火器不及燃發曾貞幹  
揮令各營環城施礮猛擊逾時豁然一聲轟塌數丈眾軍從城  
缺攀躋而入縱橫擊刺所向盡靡賊乃擁至東門望甯國一路  
而逃卽於三十日卯刻克復南陵縣城城中捕斬五百餘級搜  
獲米穀礮械甚夥臣查魯港爲蕪湖門戶南陵亦寧郡藩籬數  
日之間相繼攻克從此分道進兵規取甯蕪可無後顧之慮在  
事員弁著有微勞可否彙入繁昌案內容臣查明保獎之處恭  
候

聖裁所有官軍會克魯港要隘旋復南陵縣城緣由謹繕摺由  
驛馳奏伏乞

皇上聖鑒訓示再臣玉麟現在馳赴下游駐紮銅陵督帶各營  
赴前敵西梁山一帶察看進兵形勢合併陳明謹奏

克復太平蕪湖兩城摺

同治元年五月初三日

奏爲水陸各軍渡江夾勦克復太平府城蕪湖縣城並克金柱關東梁山各要隘恭摺馳陳仰祈

聖鑒事竊自逆匪竄踞金陵以蕪湖爲屏障以東西梁山爲鎖鑰尤以金柱關之僞城爲關鍵官軍既克北岸之西梁山賊於南岸三處防守尤嚴臣玉麟與曾國荃定計必從金柱關入手則蕪湖與金陵老巢橫中截斷賊勢乃孤遂飭總兵李成謀於四月初五日會督各營師船由鍼魚嘴駛進采石磯江口焚船毀壘率勇登岸突薄金柱關僞城萬礮轟擊幾將得手以東梁山賊援大至整隊而還臣等知該處地險城堅非水陸併攻不

能制賊死命乃將上游水師悉調赴裕溪口以下二十日曾國  
荃率馬步十五營自西梁山駕舟南渡近逼金柱關下沿隄結  
營臣  
玉麟恐築壘未固賊將擾我陸師乃派李朝斌帶外江新  
右營暨喻俊明任星元王吉內河水師三營從上游奮攻以躡  
賊後派成發翔鄧萬林內河左右營暨王明山萬化林郭明蘓  
唐學發外江水師四營黃翼升陽利見陳東友張元龍成俞卿  
楊宏勝王東華蔡東祥淮揚水師八營從下游環擊以遏賊前  
曾國荃立營既定料金柱關之賊有水軍牽制不暇顧及太平  
府一路乃率各營哨潛分隊伍捲旆疾馳遙望賊在北門修卡  
立卽揮軍掩襲斬卡突進賊方駭走入城閉關不及我軍擁進

北門羣逆狂奔驅出南門截殺三百餘級遂復府城盜賊不料官軍越蕪湖而先攻金柱關尤不料甫抵金柱遽襲郡城此四月二十日克復太平府城之情形也是夜水師眾營輪攻金柱關並未收隊二十一日王明山率外江四營先赴下游鍼魚嘴一帶臣王麟親率成發翔李朝斌任星元王吉張元龍等循隄周視布壘若塗中峙僞城雄亘數里未易猝攻旋又瞭見曾國荃一軍已繞出三汊河上馳渡對河而陣鏖戰方酣遂相率還營分水師爲三隊以一隊守定江路以一隊衝入內河直逼塔下以一隊輦礮登陸環城壘而禪牆圮棟折屋瓦皆飛賊亦矢石如雨蔽空而下時近夜分黃翼升李朝斌成發翔束草爲炬

指麾督戰陽利見王吉帶同弁勇蛇行而進將越濠溝外委王有章中槍殞命眾軍愈戰愈奮羣以火箭飛射西門哨樓賊於烈燄中衝突而出各水勇躍上隄埂短兵擊刺積骸滿渠卽時攻復金柱關而分撥黃翼升成發翔賴榮光蔡東祥張光泰王東華楊宏勝張元龍等數營乘風上駛往襲東梁山時值曾國荃陸軍擊退內河西岸之賊引軍來助甫將僞城及三汊河上駟渡數十壘一律毀平獲大礮二百七十餘尊旗幟刀矛萬餘件而謀者又報東梁山經黃翼升成發翔等一戰而下已移軍進次蕪湖此二十一日連克金柱關東梁山之情形也先是蕪湖賊目陳星斗沈國萬陳太和黃品來等經選用同知曾貞幹

密令黃潤國設法招撫本有大兵臨境舉眾內應之約至是金柱關東梁山相繼攻克蕪賊已成孤注正可乘其自疑而圖之二十二日曾貞幹自率所部將領及周萬倬劉祥勝新後祥後等軍循江而進逼壘立營並會商李成謀決開隄岸駛入小划四面合圍適黃翼升成發翔所統淮揚內河各水師自金柱關乘勝飛槳而來萬礮同轟聲震天半羣賊內亂乘墮潰奔圍而殺之幾無脫者城賊惶懼失措悉向官陡門漢家店而逸維時曾國荃親督部隊躡賊至戰橋地方聞蕪湖已復揣該縣逸出之賊必折竄而東一面令彭毓橘設伏於薛鎮渡口一面以輕騎追及於賣家灣乘賊半濟突起奮截殺斃甚夥生擒近二百

名賊乃轉走護駕墩掠舟偷渡李朝斌帶各哨舢舨自小花津  
橫出截之蒲草慶戰至三更水師傷亡甚多李朝斌不肯稍退  
比及黎明賊趨薛鎮渡口適爲彭毓橘伏兵所敗除殲斃溺斃  
外生擒至七百五十餘名之多釋放面有刺字者餘皆駁誅黃  
翼升擊賊於清水河佯餽亦以千計蕪湖東梁賊竊漏網無幾  
此二十二日克復蕪湖縣城並追賊壘勝之情形也王明山所  
帶四營之赴鍼魚嘴者二十二日抵烏江鎮該鎮對岸有烈山  
石壘二座斜對九洑洲爲犄角之勢王明山帶各船渡江逼壘  
攻擊遂時壘中旗亂我師各船分泊上下兩岸俟賊出壘登岸  
截擊擒斬無算立破堅土其九洑洲之上面又有大勝關賊壘

一座礮船護之王明山環攻逆虜未遽得手萬化林將江中賊

船全行焚燬虜賊大震奪路狂奔我軍四面蹙之剗平逆虜奪

獲鎗礮極多此又王明山等攻克太平以下爾卡之情形也臣

等伏查太平府屬莫要於蕪湖一城尤莫重於金柱關一隘自

攻奪此關未逾三日上下名城要隘悉爲我有從此全局一振

上而甯國下而金陵均有可乘之機除留國荃留貞幹不敢仰

邀議敘外此次尤爲出力之員相應繕具清單籲懇

恩施以昭激勸陣亡各將弁俟查明另單請卹其餘在事出力

員弁兵勇可否容臣等查明奏獎之處恭候

訓示遵行所有水陸官軍連克府縣兩城沿江各要隘緣由謹

會同大學士湖廣督臣官文安徽巡撫臣李續宣恭摺由驛六  
百里具奏伏乞

皇上聖鑒訓示謹

奏

官軍水陸並進屢克要隘駐軍雨花台摺

同治元年五月十七日

奏爲官軍水陸並進屢復秣陵關江心洲等要隘六處圍逼金陵駐軍雨花台恭摺馳陳仰祈

聖鑒事竊自水師陸師渡江夾剿攻克太平蕪湖兩城江岸數  
隘臣等於五月初三日會奏在案旋報丹陽鎮大股賊黨因辭  
鎮戰敗焚糧宵遁江蘇藩司曾國荃於四月二十八日率所部  
各營乘勝前進破周村卡遂駐江南鎮之板橋地方熟察形勢  
必從大勝關三汊河下手陸師乃有運糧之路水師乃有立營  
之所然橫距三十里外尚有秣陵一關環水巍峙金陵之雄鎮  
亦大勝關之右輔也賊備未嚴是可襲而取之五月初一日曾

國荃引軍馳抵關下毀壘殺賊轉戰無前守關賊酋汪伍登尚  
彪周蘭璧等舉眾獻關得驢馬二十一匹收降卒四百餘人餘  
悉解散仍飛飭前隊十二營進大定坊繞出三汊河後緊逼大  
勝關編木作橋爲詰朝進攻計初一日曾國荃派撥軍士先伏  
橋邊而以後隊六營捲旗疾進將謀合圍賊見我軍抄後懼爲  
長圍所困乘夜縱火棄巢而走公字敏字義字長勝等營踰橋  
追襲戮賊數百遂奪大勝關三汊河兩壘平之此五月初一二  
等日攻復秣陵關大勝關三汊河之情形也維時臣玉麟駐師  
金柱關聞曾國荃懸軍深入恐其爲賊所乘急約提督王明山  
率水師各營分載和州守卒渡江策應甫由烈山駛近頑關適

曾國荃亦於初三日昧爽整旅而來薄關下寨眾水勇於狂風  
巨浪中排礮仰擊無或少休陸軍乘之立拔頭關過此以往則  
爲江心洲堅大石壘倚洲雙聳對岸賊眾如麻臣玉麟會同王  
明山親督萬化林王吉成發翔郭明齧唐學發陳百嚮喻俊明  
彭楚漢等八營直逼洲次飛礮入壘賊亦穴牆還擊羣子蔽天  
而下士卒傷亡裏尸更進戰至日晡各勇挾火具登岸蛇行蘆  
葦中逼壘縱焚燎及蘆葦一片火光江面人聲喧若鼎沸我軍  
振臂齊呼躍入賊牆燒雉羣醜撲火澗水橫塞江流賊船百餘  
號賊礮數百尊悉爲我有登岸水勇仍上師船鼓槳飛行並奪  
蒲包洲遂泊金陵之護城河口曾國荃由陸路倚護水師驅軍

直入偏紫雨花台距城不及四里城賊數來窺犯輒行擊卻此  
初三日連復頭關江心洲蒲包洲之情形也臣等查金陵城大  
而堅未易猝拔前向榮和春等屯兵七萬歷時八年師老無功  
此次水陸兵數僅逾二萬雖濱江重險先後攻奪尚難遽爲仰  
政之策應俟曾貞幹六營多隆同一軍增調到防再籌大舉所  
有出力將弁兵勇可否容臣等歸於太平蕪湖案內擇尤保獎  
出自

恩施所有水陸各軍屢復沿江要隘圍逼金陵緣由謹會同大  
學士湖廣督臣官文安徽撫臣李續宜由驛陳奏伏乞

皇上聖鑒訓示謹奏

近 日 軍 情 片

同 治 元 年 五 月 十 七 日

再 近 日 軍 情 自 偽 輔 王 楊 七 順 子 退 回 畱 國 後 浙 東 之 賊 勢 稍  
鬆 江 西 之 邊 防 亦 固 偽 侍 王 尚 在 衢 州 一 帶 左 宗 棠 分 兵 開 守  
開 化 馬 金 街 以 固 徽 婺 之 防 親 率 馬 步 各 營 赴 衢 剷 辦 劉 培 元  
所 部 已 由 玉 山 入 浙 仍 俟 蒋 益 澄 大 隊 到 防 方 可 由 衢 延 雨 郡  
分 道 而 進 鮑 超 一 軍 於 初 四 日 大 獲 勝 仗 攻 克 寒 亭 管 家 橋 等  
處 賊 壘 移 營 進 紫 節 節 阻 戰 尚 距 畱 郡 十 餘 里 據 江 蘇 侯 補 府  
趙 炳 麟 粟 稱 探 聞 湖 州 於 五 月 初 三 日 失 守 鮑 超 以 畱 國 賊 勢  
太 重 萬 難 抽 兵 援 湖 李 楚 材 聞 道 赴 援 不 知 何 處 橫 阻 亦 未 趕  
到 臣 一 聞 此 信 且 懊 且 憤 俟 探 明 確 實 繼 行 具 奏 曾 國 垅 一 軍

由太平下逼金陵本得建瓴之勢惟該城前此數年圍師七萬此次兵僅萬餘屯禁南面一隅洪逆見慣不驚似無恠懼之情臣擬調多隆阿一軍前往會剿趁此軍威極盛之際四面猛攻當可得手此時各省多故處處須兵臣愚謂宜以全力會辦江南先復財賦之區克一城有一城之利拓一里取一里之財究竟遠勝於他省但使每年能解蘇漕百餘萬石淮課數百萬兩進京俾戶部稍資周轉

京師根本之地有恃不恐則各省可次第勦辦矣俟商官文多隆阿定議行之除鮑超初四之捷另行奏報外理合附片具陳伏乞

聖鑒訓示謹

奏

鮑超軍進攻甯郡剿平逆蠻摺 同治元年五月十九日

奏爲鮑超一軍進攻甯郡破賊於寒亭管家橋等處諸蠻悉平  
恭摺馳陳仰祈

聖鑒事竊浙江提督鮑超統率馬步各軍於四月二十五日由  
青陽拔隊前進甫抵青弋江結筏東渡諜報僞輔王楊逆糾眾  
十餘萬堅守甯國府城僞對王洪逆一股屯聚團山圖犯蕪湖  
南陵等縣僞衛王楊雄清一股踞紮寒亭獅子山分擾梅家店  
管家橋一帶以阻進兵之路鮑超知賊勢方盛未可猝搜其鋒  
乃於抱龍岡隔河布營潛治牆濠不遽出戰以懈賊心仍帶各  
營哨循山徑而入勘明地勢於五月初四日先遣劉玉堂吳騰

芳二營黃慶唐仁廉李文益三營潛渡山岡分道設伏復飭周  
有勝馬勝奎所部進薄寒亭散布隊伍誘賊出壘鮑超親督將  
士繞越翟村木瓜橋涉淺過河令總兵婁雲慶劉順隆王衍慶  
諸營突從左路進以韋志俊志字四營繼之令宋國永譚勝達  
熊鐵生諸營突從右路進以翦炳南段大有兩營繼之維時寒  
亭之賊方以周有勝馬勝奎孤軍深入絕無後援可吞而取也  
遂出巢猛圍益逞梟悍晝見左右兩路大軍掩至正在旁皇郤  
顧乃附近村落中羣賊響應擁眾齊出排列山梁數逾四萬鮑  
超遂令顏紹榮陳得勝楊鎮魁等騰踔而入直搗中堅縱橫盪  
決將弁頗有損折明興伍華瀚以騎隊抄出管家橋先翦其右

翼宋國永譚勝達婁雲慶劉順隆王衍慶熊鐵生等橫躍入陣  
衝賊數段不復成伍適山岡後伏兵亦發扼斷歸路唐仁廉擒  
僞順天安楊民清僞撫天福黎奉民於陣馬勝奎周有勝乘勢  
搶過寒亭浮橋徑取護橋二壘毀之賊乃負創驚潰眾軍追襲  
二十餘里將寒亭管家橋梅家店直至獅子山賊館數十處賊  
壘三十五座同時踹平一路斃賊六千有奇楊雄清糾合零匪  
遁回甯郡臣查甯國一城屏蔽蘇浙爲賊與我所必爭之地近  
日南岸連克數城敗賊多萃於此聞逆黨聚至二十萬之多臣  
深以兵力單薄爲慮自此捷則已復之數縣賊或不暇復萌  
窺伺而我軍節節進攻圍逼郡城亦漸有可乘之隙除仍檄令

速籌攻取外此次陣亡將弁十八員名另繕清單應請

敕部從優議卹所有官軍擊賊獲勝勦平寒亭管家橋等處逆

壘緣由謹繕摺由驛具奏伏乞

皇上聖鑒訓示謹

奏

議覆兼摺通商大臣摺

同治元年六月初六日

奏爲遵

旨籌議恭摺覆陳仰祈

聖鑒事同治元年五月二十九日承准議政王軍機大臣字寄  
五月十七日奉

上諭前因薛煥熟悉外國情形諭令以頭品頂戴充辦理通商  
事務大臣並疊諭將洋人協勦諸事會商新署巡撫李鴻章妥  
爲經理茲據薛煥奏南洋通商各口事隸將軍督撫監督辦理  
若專設大臣統轄地方較多鞭長莫及事勢亦多格礙該大臣  
稽察稅務多屬具文而一切辦公經費以及書吏差役等項經

費均需添設稽祿虛糜於事無益請卽裁撤各歸本省督撫將軍經理並片陳長江通商事屬創始必須平時勲望隆重乃能警服遠人請於官文曾國藩特簡一員兼領其事名等語南洋通商大臣本係道光年間經考英等議定設立以爲交涉事件在外商辦之計迨英法各國公使駐京後一切緊要之件均由總理衙門辦理其餘關稅事務則由管關之監督道員會同各國領事官經理仍由該省將軍督撫稽察已足以資控馭上海雖爲各國匯集之所而所設祇有領事官若該道辦理得宜巡撫安爲稽察則諸務已有責成所請裁撤之處洵爲因時制宜欽差大臣本係改爲兩江總督兼攝兩國藩威望遠著爲外國

人所尊服長江通商事務由該大臣經畫自能措置合宜惟前  
因曾國藩辦理軍務在江面布置昕夕不遑若再任以通商事  
務非所以示體諒現在江面肅清應如何妥爲兼籌之處卽著  
酌量情形迅速具奏辭煥所稱南省宜以督撫兼領其駐紮之  
地須離洋人稍遠辦理方可順手倘李鴻章駐鎮以後能否兼  
顧無誤曾國藩從前曾經議及並著一併詳籌奏聞等因欽此  
仰見

皇上循名責實因時變通之至意臣才識凡庸於西洋通商事  
務尤未諳究第就各省海口論之則外洋之通商正與內地之  
鹽務相同通商係以海外之土產行銷於中華鹽務亦以海濱

之場產行銷於口岸通商始於廣東由閩浙而江蘇而山東以達於天津鹽務亦起於廣東由閩浙而江蘇而山東以達於天津通商之有五口大臣三口大臣猶鹽務之有兩淮鹽政長蘆鹽政也通商之有監督關道猶鹽務之有運司鹽道也通商之綜匯於總理衙門猶鹽務之綜匯於戶部也通商惟長江交易最廣以漢口爲都會亦猶鹽務惟兩淮引地最廣以漢口爲都會也今薛煥請裁兩淮通商大臣歸併地方亦猶道光十年陶澍請裁兩淮鹽政歸併總督也以南洋之廣設一大臣統轄江楚蘇浙閩粵六省數千里之遠薛煥所稱鞭長莫及誠屬實在情形所有廣東福建浙江三省應遵此次

諭旨卽由監督道員經理將軍督撫稽察已足以資控馭至長江深入腹地路遠事繁臣竊以爲當分別辦理自輪船入鄂以來洋人蹤迹幾徧沿江郡縣或傳教於僻壤採茶於深山違一言而嫌隙遽開聾一髮而全神俱動關道以洋人恃其凶橫而不敢誰何督撫以洋務非其專責而不肯深究勢必至睚眦小忿皆取決於總理衙門道途太遠後患孔長且立法之初當規久大之計柔遠之事必擇專精之人今曰求一二精於洋務者尙難其選而謂此後數百年沿江兩督四撫一一求精於洋務者而爲之豈可得哉臣愚謂此缺似不可裁宜改爲長江通商大臣專辦濱江四省中外交涉事件或駐鎮江金陵或駐漢

口九江添設官屬書役若干廉俸經費若干應請

欽下總理衙門會同該部核議其漢人洋人之大小詞訟在滬  
在鄂之正子各稅何者由通商大臣專決何者歸總理衙門核  
覆亦應與駐京公使熟議其北洋三口通商事同一律均宣討  
論職掌永定章程區區愚見蓋爲數省計久長非爲一人圖推  
諉也至兩江總督一缺統轄三省文武兼管漕河兩端鹽務又  
其專責卽在承平之際幹濟之才已覺竭蹙不遑况以微臣迂  
鈍之質又值髮逆糜爛之餘夙夜憂懼顛躡實在意中不敢因  
偶爾之戰勝倘來之虛名遂自忘其醜陋軍務未竣之前臣實  
不能兼辦通商事件署撫臣李鴻章資望尙淺軍事方殷亦於

洋務不甚相宜伏求

皇太后

皇上曲賜鑒諒臣等幸甚倘蒙

天恩另設長江通商大臣則所轄地方有關涉洋務者臣仍當悉心籌畫公家之利知無不爲昔年兩淮鹽政未裁之前江督亦有緝私督運之責湖廣亦有查引督銷之責今於通商推其意以行之官文總理於上游臣則稽查於下游不敢因別有專員遂爾置身事外上負

聖主委任之意所有遵

旨迅速籌議緣由恭摺由驛六百里覆奏伏乞

聖鑒訓不謹

奏

議覆調印度兵助勦摺 同治元年六月二十二日

奏爲遵奉

諭旨妥議具奏事同治元年五月二十九日承准議政王軍機大臣字寄五月十七日奉

上諭總理各國事務衙門奏據崇厚函稱詢據英國領事官吉必勛聲稱青浦嘉定二城髮逆大隊湧至華爾察看情形難以抵禦現在退回上海休息有另調印度兵來秋閒大舉之說崇厚擬請許其興兵約其助勦以收有用之效該王大臣等慮及外國兵入內地攻勦不特得一處代守一處足爲中國腹心之患卽得一處焚燬一處如嘉定青浦二城亦實爲地方瘡痏之

奏和卷一  
災東南蹂躪不堪何可再受外兵之擾請飭曾國藩等於外國  
兵未到之先激勵三軍將蘇杭要地先行收復否則設法防範  
或與印度兵同力合作不致滋擾等語借兵助剿之議曇經曾  
國藩等先後覆奏僉稱有害無利前因上海喫緊英法兩國幫  
同戰守是以姑示羈縻未經阻止該兩國與髮逆仇隙已深若  
徑調大兵分路進攻翦除髮逆固屬大快人心惟若盡如嘉定  
青浦之勢則利不償害且恐守以西兵運掉不能由我爲患曷  
可勝言現在江南之師連克名城已成破竹之勢曾國藩函致  
總理衙門擬令黃翼升統帶水師由松瀘直入太湖以爲進兵  
之路甚合機宜著該大臣卽乘此聲勢督飭各軍進逼金陵迅

圖克復李鴻章將上海事宣佈置後亦卽趕赴鎮江由句容一路會師進剿兩路夾攻可期得手若金陵旣拔則蘇常勢必瓦解官軍可一鼓成功各要地均爲我有自可杜外國覬覦之心卽屆時調兵前來見我兵旣已得手則無所更用彼力自必廢然思返萬一金陵尙難還拔而印度大隊已到應如何豫籌兵勇以備臨時會同攻取不致授柄於彼之處著曾國藩等會商妥議總期防患未然免致臨時失措總理各國事務衙門原摺片均著鈔給閱看等因欽此六月初九日復奉五月二十五日寄諭近聞洋人因官軍近取金陵擬撥輪船前來助剿好勝爭功是其故態若必待西兵會剿將來攻克金陵後必啟其輕視

之心該大臣等務當激勵各軍乘此破竹之勢進逼金陵迅圖克復毋令洋人以助効爲名轉致另生枝節等因欽此伏查咸豐十年十月蒙

先帝垂詢哦法兩國助効之事臣覆奏以爲當許其來助而緩其師期本年三月蒙

諭旨垂詢英法兩國助効之事臣覆奏以爲同防上海則可借攻內地則不可洋人若先攻蘇常臣處無會戰之師若克復城池臣處亦無派守之卒定議於先或不致責怨於後等情奏明各在案茲復欽奉

諭旨以印度兵來秋閒大舉飭令會商妥議臣函商左宗棠李

鴻章等據左宗棠復函云青浦嘉定二處髮逆屬至夷兵遠遁  
夷人之畏長毛亦與我同委而去之真情畢露斷無起印度之  
兵助勦此賊之事蠻人借助勦爲圖利之計借起兵爲解嘲之  
詞耳兵頭縱有此意國主未必允許印度縱有兵來其數未必  
能多據李鴻章覆函云官軍自二十一日虹橋大捷之後洋兵  
待我兵敬禮有加提督何伯來營會晤詞意和順然窺其中若  
有不足者青浦嘉定之退不免羞恚自云須八月後調大英兵  
來恢復青嘉該提督始能回國並無調印度兵來之說臣查西  
人天性好勝睚眦小忿不肯甘休青浦嘉定之挫既羞見侮於  
髮逆尤慮見輕於

天朝其興兵前來報復係屬意中之事惟英法舊例兵謀會議於眾國兵費征斂於眾商非一人所能爲主青嘉一退之羞不至遽觸大眾之怒國主未必因此而大舉商賈未必因此而加征其兵數必不甚多亦可懸揣而知崇厚既有所聞似宜由總理衙門與駐京公使查詢確實然後申大義以謝之陳利害以勸之中國之寇盜其初本中國之赤子中國之精兵自足平中國之小醜姑無論本年春夏連克二十餘城長江上下肅清三千餘里髮逆無能久之理吳越有可復之機即使事機未順賊談未衰而中華之難中華當之在

皇上有自強之道不因艱虞而求助於海邦在臣等有當盡之

職豈輕借兵而貽譏於後世此所謂申大義以謝之也粵匪行  
徑本屬無賴之賊青嘉兩城尤屬至微之事英國若徵印度之  
兵爲報仇之役多調則勝之不武少調則不勝爲笑徒使印度  
軍士支領英國之餉銀蹂躪中國之土地上不利於國主下不  
利於英商不如早議息兵俾松滬免無窮之擾卽英法皆無窮  
之費此所謂陳利害以勸之也斯二者總理衙門與駐京公使  
委曲商榷如俱不見聽則亦別無阻止之法仍當先與議定西  
兵進攻內地臣處無會勦之師若克城池臣處無派防之卒區  
區鄙見不得不重言申明至於設法防範殊乏良策洋人語言  
不通風俗迥異彼以助我而來我若猜忌太深則無以導迎善

氣若推誠相與又恐其包藏禍心觀於漢口焚船等案片言不合戎事立興嫌衅一開全局瓦裂臣始終不願與之會勦者蓋亦籌之至熟與其合而復離不若量而後入倘我軍屯駐之處彼亦不約而來寔偏處此臣當諄飭部曲平日則言必忠信行必篤敬臨陣則勝必相讓敗必相救但有謙退之義更無防範之方吾方以全力與粵匪相持不宜再樹大敵另生枝節庶幾有容有忍宏濟艱難愚慮所及不審有當萬一否所有遵旨妥議緣由理合會同浙江撫臣左宗棠江蘇撫臣李鴻章恭

摺覆奏伏乞  
皇上聖鑒訓示謹奏

金陵陸師勝仗張勝祿請卹摺

同治元年七月初二日

奏爲金陵陸師屢卻撲營悍賊損一良將懇

恩優卹恭摺仰祈

聖諭事竊江蘇藩司曾國荃一軍在雨花臺秣陵關等處禦賊獲勝臣於六月初六二十二等日附陳梗概在案先是曾國荃督軍東下直逼金陵以地曠兵單添調曾貞幹所部各營駐三汊河江東橋一帶傍水築壘以保西路之糧道仍派長勝副後吉後嘉字等營移紫雨花台以扼東路之要衝五月二十三等日城壘各賊乘我營寨未成糾眾二萬直前猛撲傷營勇十數人我軍先派馬步各隊伏於山後至是一聲鼓角分左右兩

翼抄出朱洪章率同劉永祥衝入賊隊劉玉春曾昭禮揮兵盪  
擊斬獲二百有奇賊乃紛潰劉永祥追蹤騎馬賊酋撲近石壘  
中槍殞命二十二日探報秣陵關之賊擾及六郎橋一帶大掠  
民糧曾國荃潛遣周曰昇等各率騎隊出賊不意邀截於朱門  
之外賊見我軍猝至列陣迎敵周曰昇胡良作率各騎自左路  
抄之賊黨棄糧思遁楊鉅南又自右馳繞其後縛賊數百悉斬  
於陣盡奪米穀以給村民自賊之數爲我敗也闔城惶懼飛書  
召援有僞王宗李酋糾集悍黨來自蘇州於六月初六初十等  
日兩次窺營火器對轟互有損傷提督銜記名總兵張勝祿中  
洋槍子洞穿左足曾國荃旣惜傷一健將而賊計甚狡料數日

內必有戰事豫飭各營密爲戒備果於十六日城賊援賊出四五萬人分二十餘枝以一枝向湘恆等營以一枝向信義等營以一枝向猛惠等營以一大枝包過副後南後長勝公字敏字等十一營之後而中路悍賊猛攻雨花臺一帶長濠我軍堅守營牆憑濠穩擊傷斃極夥賊竟裂旗裹尸昇之而行曾不少卻其犯公字敏字兩營者已焚哨棚而進其犯副後南後兩營者亦將踰卡橋而登劉連捷曾昭禮劉玉春等見有黃衣騎賊指揮督陣猛驚罕匹潛然巨礮一發而殪卽乘羣賊靡亂之時派隊出卡併力掩擊立解重圍維時西南一路賊勢方張馮蘭亭力戰死之崔文田倪桂李金洲等拔卡而出馳斬二賊目遂與

劉連捷所派之隊合軍追勦計殲賊近二千人擒賊逾二十名  
訊據供稱是日之賊實斃僞官數十僞對王亦在其中由是賊  
膽愈寒軍心愈奮曾國荃正在圍內修營徐圖進取乃甯國克  
後餘匪竄逃金陵嘯聚於雄黃鎮者數又以二萬計二十四夜  
勾合城中之賊捲旗息鼓謀襲我營或以大隊分伏濠邊或以  
另股抄出營後天甫向曙一齊揚隊直撲猛惠公敬四營易良  
虎易良豹曾豐凡王仕益凌有和崔文田蕭開印等令各勇穴  
牆施礮使不得近伺賊稍懈突擊之倉猝交鋒返奔弗及半  
就誅吏而東路圍攻副後南後長勝等營之賊亦經劉連捷劉  
玉春曾昭禮朱洪章等引軍擊走佯無算據曾國荃四次稟

報前來臣查該軍圍金陵地大兵單旁無應援洪逆老奸巨寇前與圍師八萬相拒數年見慣不驚此次以官兵爲數無多常挑悍賊前來撲營我軍苦戰苦守盛暑鏖兵雖欠餉日入將士尚能用命今時歷兩月布置漸周自守有餘卽可徐謀攻取記名總兵張勝祿謀勇兼備轉戰湘鄂江皖以達江蘇五省數千里之遙屢建殊勳此次克復太平蕪湖案內擬保提督未及開單彙奏乃搶護營壘猝中鎗子猶復負創強起力籌攻守不數日因傷殞命實堪憫惻合無仰懇

陣亡例  
天恩准將提督銜記名總兵圖爾古齊巴圖魯張勝祿照提督

賜卹並從祀湖南長沙府湘鄉縣各該處昭忠祠俾奠殺魄而  
作士氣藍翎游擊劉永祥擬保游擊儘先都司鄖蘭亭應  
敕部均照游擊陣亡例議卹以昭激勸所有金陵悍賊撲營屢  
獲勝仗並將死事各員分別請卹緣由謹會同大學士湖廣督  
臣官文繕摺由驛馳陳伏乞

皇上聖鑒訓示謹

奏

克復甯國府城摺

同治元年七月初二日

奏爲官軍攻勦甯國疊挫賊鋒乘勝合圍遂將府城克復恭摺  
馳陳仰祈

聖鑒事竊浙江提督鮑超督率各營在抱龍岡等處毀平賊壘後屢獲大勝隨克甯郡臣於六月初六二十二等日兩次附陳梗概聲明續報戰狀在案旋准鮑超先後來文據稱僞輔王楊逆堅伏城中正在繕修守具一聞寒亭戰敗卽糾逆黨四大股繞城結壘延亘三十餘里一曰僞保王踞城東之夏家渡孫家埠一曰僞天將踞城南之綠錦鋪畢冲鋪一曰僞八王踞城北之圖山廟埠及洪村嶺楊逆自與僞桂王合股由城西之敬亭

山連營至望城岡一帶以圖力拒我軍五月初十日鮑超引軍進駐烏沙鋪暫息士卒周歷形勢必自抱龍岡得手而後可擊散賊黨尤必從望城岡下手而後可俯瞰賊巢十五日嚮明先令婁雲慶吳騰芳伍華瀚翦炳南等潛出碑林岡陳得勝唐仁廉明興馬勝奎等潛出安宜口會伏於望城岡後而以韋志俊所部爲游兵仍令宋國永周有勝王衍慶數隊直取中堅以誘賊賊果輕我兵寡直壓山岡而下甫及交鋒鮑超復令黃慶劉玉堂劉順隆等十營張兩翼抄來羣賊勢沮將圖卻走瞥見旗幟林立掩映山谷間以爲城南城北之賊悉衆來援也回鞭轉鬪洶湧若潮不意婁雲慶陳得勝等兩枝伏軍突從山谷中騰

而前衝賊數段韋志俊率薛金榜等營截斷賊後宋國永周  
有勝等揮軍乘之短兵擊刺遇者輒殞逸出之賊又爲明興伍  
華瀚騎隊追及擒獲近五百人殲斃逾八千名遂破望城岡並  
將抱龍岡安宣口碑林岡敬亭山十數村落逆壘悉平東南北  
三路賊衆亦卽棄巢紛竄退聚河西河東此五月十五日擊賊  
毀壘進軍城下之情形也該逆旣受大創略無鬪志乘我未布  
長圍陰結另股三僞王列隊城根並築堅壘於夏家渡石橋之  
側以爲負固自完之計鮑超四次挑戰圍不出單遂於六月初  
八日統率馬步各軍逼壘下寨賊不能堪由北城出萬餘眾前  
來迎拒我軍一擊敗之初十日賊復由南城出二萬餘眾悉力

撲犯我軍再擊又敗之十四日僞循王魏超成僞干王洪仁玕等於南門胡廬山鱖魚山一帶列隊冀襲我後僞襄王劉官方等於北門廟埠圖山一帶列隊希圖夾攻而西門亦別出大股靠壘爲陣鮑超見賊已渡河喜告諸將彼有鬪心吾乃可一逞也遂飭婁雲慶馮標譚勝達唐仁廉伍華瀚等向北門進張應超楊鎮魁段大有等向西門進宋國永黃慶明興李文益馬勝奎等向南門進而以韋志俊四營趨南門之左張遇春二營趨南門之右維時城賊壘賊蜂擁出敵我軍如牆併進搏戰逾時未遽得手宋國永黃慶躍入陣中縱橫盪決先將中路一股擊敗明興劉順隆截出夏家渡石橋遏賊歸路賊旅漸亂撲河返

奔馬勝奎李文益遂將石橋二壘踏毀韋志俊張遇春亦自山腰斜衝而出賊眾紛潰將過浮橋周有勝熊鐵生焚橋截住幾無脫者南門旣已獲勝僞襄王一股瞭見南路火發遂棄廟埠圖山而遁婁雲慶馮標唐仁廉奮力尾追伍華瀚吳雲集從旁徑突出乘之適張應超楊鎮魁等亦於西門告捷削平附城三壘三路整軍來會集於小東門外將沿河僵仆之賊補刀殲之十五日楊輔清復出大東門收合餘燼爲背城借一之舉鮑超率各軍驟進勢如風雨該逆一戰卽北狂奔六十里已近洪林橋矣楊逆忽率馬賊二千餘人回陣返撲馬勝奎緊躡賊後中槍而殞將士亦多損折鮑超令諸營徐列圓陣將該逆人馬并

以大圍包之環加勦洗楊逆單騎脫去從馬千餘匹盡爲我有  
城賊見楊逆一敗不返倉皇失措有議降者有議戰者有議閉  
城再守者紛紜未定我軍已自洪林橋收隊歸來大呼直入東  
門除跪降及老弱婦女外一律斬雍無遺立將府城克復前後  
斃賊幾及二萬生擒酋目三百餘名得大小礮位六十五尊此  
六月十四日大戰全勝十五日克復甯國府城之情形也臣查

甯郡一拔則江浙之門戶已開金陵之機勢漸緊由是略取東

壩會剿下游可無兵單之慮浙江提督鮑超圖署苦戰屢復名  
城厥功甚偉惟係專閫大員應如何  
加恩之處恭候

聖裁至此次尤爲出力人員暨陣亡各將弁相應分繕清單懇乞

恩施以昭激勸其餘在事出力員弁兵勇容臣查明專案奏獎所有官軍勦賊屢勝攻克甯國府城緣由謹具摺由驛六百里馳奏伏乞

皇上聖鑒訓示謹

奏

懇豁免江西歷案攤捐款項片

同治元年七月初二日

再咸豐四年十一月

臣

於水師勝仗摺內奏稱百姓感戴

皇恩淪肌浹髓我

國家深仁厚澤二百餘年不當此大亂之後不知感人之深一  
至於此等語今倏忽又閱八年每當寇賊非常之警尤見民情  
愛戴之誠卽至庚申夏秋蘇常之失海淀之變而中外晏然纖  
塵不驚耕鑿如故益嘆我

朝人心之固結殆爲亘古所未有顧人心雖如此固結而寇盜  
卒不能廓清頻頒蠲緩之

詔書而民困未曾蘇息屢下整飭之

嚴旨而吏事亦未振興其故何哉臣嘗反覆尋思竊以爲民生  
之困由錢漕浮勒之未革也州縣之困由攤捐款項之太多也  
欲振民窮須力除錢漕之弊欲飭吏治須盡豁攤捐之款江西  
錢漕一事臣與撫臣沈葆楨現方設法減征容俟妥議章程另

臣請爲

臣請爲

案會奏其攤捐一事臣請爲  
皇上先陳其概攤捐云者從前虧空之款無處彌補則令州縣  
勻攤以捐補之目下需用之款無處籌給則令州縣勻攤以捐  
給之者也目下需用之款不過本省自捐自用苟能另籌經費  
即可立停攤捐從前虧空之款則係奏明派攤屢奉部文者約  
有四款一係道光二十五年豁免案內查出官墊民欠及攤補

兵差經費等銀一百二十二萬七千餘兩經前撫臣陸元烺奏准部議責成現任州縣自二十一年六月起分年攤補歸款除已完外未完銀九十六萬一千餘兩一係道光二十八年清查案內查出因公挪缺銀三十萬三百餘兩經前撫臣費開綬奏准部議自三十年起分作十二年由巡撫司道府州暨優缺州縣公捐銀十二萬兩津貼瘠缺各縣歸補原挪之款其餘銀十八萬三百餘兩著落各該縣自行按年彌補除已完並巡撫司道府州應捐不計外各州縣共未完銀十八萬一千餘兩一係咸豐元年豁免案內查出清查以前官墊民欠六十六萬七千餘兩經各前撫臣奏准部議飭自咸豐二年六月初一日爲始

隨同上屆挪墊兵差銀兩分年按限帶攤歸補一係清查以後續墊民欠銀三十四萬三千餘兩部議著落原郴州縣及各該管上司全數賠補此四者江西各屬奏派攤捐之所由來也往昔地方無事年穀順成各州縣於丁漕考成之餘閒有略解攤捐之款迨軍興以後地方蹂躪民氣凋殘按年額徵之正賦非查辦蠲緩卽徵解不前所有應攤前項道光二十五年豁免案內挪墊兵差及二十八年清查挪缺等兩款已覺完解寥寥其咸豐元年豁免案內查出之清查前後挪墊兩款更屬力難兼顧綜計近年解攤款銀兩者按限核計不及十分之一二且或於攤款少有所盈反於正賦大有所絀譬之盜鈴而掩耳挖肉

而補瘡雖有攤捐之名並無補苴之實湖查嘉慶十八年十月  
十六日奉

上諭直隸等十四省清查虧欠銀兩等項節經各督撫等將彌  
補章程奏明辦理此內除陝西一省扣至本年四月限滿是否  
全數完交現尙未據奏到又廣東省虧短銀兩全完尙有未完  
穀石亦據奏明分年彌補朕恩此項虧短銀兩穀石各督撫奏  
定分限展限章程責令州縣按限完交而州縣籌補之法仍不  
能不借資民力現在直豫東三省邪匪滋擾其餘各省亦間有  
荒旱處而民氣未紓若州縣官藉彌補爲名仍科斂於民非所  
以休養生息也著傳諭各該督撫等卽將此次虧缺銀穀確數

查明現已完解實儲在庫者若干其未完者若干據實截數奏明暫行停止彌補等因欽此當經前撫臣先福查明江西未完各款截數奏明暫停彌補嗣後屢奉部催並未報解分釐迄今已五十年是嘉慶

諭旨之所謂暫停者實與永停無異矣然則道光年間攤補之款又可期其有實收之日乎至州縣之稍知自愛者無不以攤捐爲大患履一日之任卽有一日之虧罷官以後回籍尙有資追身沒之後子孫尙須著賠一經署缺受累無窮其不肖者則又借奏攤之名爲朘削民膏之目毫無益於國計大有損於吏治臣不揣冒昧籲求

聖主施浩蕩之恩

錫逾常之典俯准將江西各州縣應攤前項各款共未完銀二百一十五萬四千餘兩概予豁免俾閭閻無科勒之苦州縣無暗累之虞庶幾政肅令行日臻上理仰副我

皇上惠愛黎元勤求吏治之至意倘託

聖主鴻福軍務漸竣歲事豐稔此後江西額賦年清年款何患部庫之不充若虧後此按年之課徒索前此紙上之債亦復何補如蒙

恩旨俞允臣當飭司再查各州縣已完及請免各細數造冊送部查核其本省需用之款向由州縣攤出者臣與撫臣當另籌

項永禁攤捐專案奏辦緣奉

諭旨以江西民困未蘇飭臣查辦謹一併附片瀝陳伏乞

皇太后

皇上聖鑒訓示謹

奏

安徽巡撫李續宣聞訃丁憂摺同治元年七月初十日

奏爲安徽撫臣聞訃丁憂恭摺馳奏仰祈

聖鑒事竊臣於七月初九日准安徽撫臣李續宣咨稱同治元

年七月初六日在六安州行營接到家信親母蕭氏於本年六

月十六日在湖南湘鄉縣原籍病故該撫臣係屬親子例應丁

憂飛咨臣代奏開缺請

旨另行簡放其前帶赴皖之記名提督成大吉蕭慶衍道員蔣  
凝學毛有銘副將王載駟等軍歸臣節制調度該撫臣卽回籍  
奔喪守制等因前來臣查李續宣天性純孝內行敦篤咸豐九年  
因救援寶慶之便回籍省親其時母病沈重瀝稟在家侍疾

因軍務緊急經臣等催令勉強赴營李續宣私心內疚近日因自患咯血之症尤時時慕戀雙親或至終夜不寐此次驚聞母訃自應遵例丁憂回籍治喪惟軍事方殷該撫威望素著關繫甚重湖查咸豐八年前湖北巡撫胡林翼在任丁憂督臣官文奏請改畱署任欽奉

諭旨胡林翼穿孝百日後仍著署理巡撫如須扶柩回籍再行賞假兩箇月俟軍務告竣准其補行終制等因欽此維時湖北巡撫印務係督臣官文兼署臣現擬仿照辦理已咨復李續宣將巡撫關防派員齎送安慶省城由臣暫行兼署成大吉等軍臣亦當悉心照護妥爲調遣惟兩淮勦撫事宜頭緒繁苗沛

霖及各巨捻深畏李續宣之威而良民各安又感其撫綏之德  
皖北及鄂省之兵多係該撫部下勁旅實非他人所能接辦臣  
事繁才短深恐照料難周貽誤大局該撫臣奔喪一節應否援  
照胡林翼丁憂之例

賞假數月仍令回皖署理撫篆抑或准其開缺守制另行  
簡放安徽巡撫之處恭候

聖裁所有安徽撫臣聞訃丁憂緣由恭摺由驛六百里馳陳伏  
乞

皇上聖鑒訓示謹  
奏

近 日 軍 情 片

同 治 元 年 七 月 初 十 日

再近日軍情曾國荃圍攻金陵之師與賊相持常有零股前來  
搦戰小有擒斬未開大仗鮑超克復甯國之後臣檄令進攻東  
壩高淳溧陽溧水句容一帶作遠勢盤旋而來然後屯駐於金  
陵之東北隅與曾國荃相爲犄角據鮑超呈稱軍士勞苦太久  
疾病甚多應請稍爲休息再行進兵其廣德州僞保王投誠一  
案亦尙未辦理妥適石清吉守廬州之十營經官文等調令南  
渡助勦金陵商之李續宜另撥數營接防廬州臣意李續宜方  
以全力經營苗黨自難分撥防廬之師已咨復官文等飭令石  
清吉仍守廬州無庸南渡乃李續宜籌辦苗黨甫有頭緒今忽

聞訃丁憂卽須回籍治喪事機未順波折尙多殊深焦灼袁甲三病狀近日不知何如李續宣旣須離營應憇

聖恩飭畱袁甲三駐紮臨淮庶兩淮上下不至過爾空虛謹將近日各路軍情附陳梗概伏乞

皇上聖鑒謹

奏